

# Team 台灣

蘇美凌

世界棒球 12 強比賽已經落幕矣，嘛予咱全國的人真大的振奮和啟發。

這場球賽會當這爾丫食目，來自一个好的領隊會當授權尊重專業、提供一个好舞台予每一个人發展潛力；教練團个个身懷絕技、專心提供好的對策予舞台頂的球員誠安心的打著每一粒球；隊長陳傑憲的特質，了解隊友、鼓舞隊友，共逐家黏做伙，予全隊的士氣超越對手。上蓋重要的是一場閣一場的勝利，予比賽前足濟看個無的批評聲浪停歇落來，「Team 台灣」的畫面予規場的熱情燒袂停。

冠軍到手的時陣，總教頭曾豪駒表現出無佇地主球場開香檳慶祝勝利的風度，予世界的人知影台灣人的人文素養，真正有懸度、有智慧矣！

這擺比賽頭到尾攞非常緊張刺激；毋管情報的蒐集、教練調度、每一个隊員全力以赴，全隊仝心、拄到危機，互相信任佮鼓勵，加上觀眾加油熱度沖沖滾。會當進壘得分、化解風險，提到一擺閣一擺的勝利，攞是通力合作的結果，足濟精彩的過程，予人呵咾甲會觸舌矣！

2024 年世界棒球 12 強賽，是 AI 時代安搭人心第一好的養份。善良、守本份、勤勞、樸實已經是台灣人的標誌佮使命，咱逐家就愛珍惜這港正能量，好好發揮潛能，予「Team 台灣」這個品牌會當繼續成為世界的典範！